

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 1, No. 019

原始資料: 蕭鎮國大德提供, 張文明大德提供, 北美某大德提供

No. 19 [No. 1(19), No. 95(1192), No. 96(105)]

佛說大三摩惹經

西天譯經三藏朝散大夫試鴻臚卿傳教大師臣法天奉 詔譯

如是我聞。一時佛在迦毘羅林。與大苾芻眾。皆阿羅漢。諸漏已盡。所作已辦。速得己利。盡諸有結。心得自在。如是五千五百人俱。

爾時十方。復有釋梵大威德諸天。與諸眷屬恭敬圍繞。身色端嚴。光明照耀。來迦毗羅林。詣世尊前。頭面禮足。住立一面。時四大梵王各以伽陀而頌佛德。第一梵王。而說頌曰。

此大三摩惹 宣揚妙法音

我佛無能勝 天人普來集

第二梵王。而說頌曰。

歷大僧祇劫 修行深信心

守護眼等根 不住諸塵境

第三梵王。而說頌曰。

戒定慧真實 清淨無垢染

如帝釋金剛 堅固不可壞

第四梵王。而說頌曰。

若人歸依佛 永不墮惡道

彼人命終時 速得生天上

爾時世尊。以淨天眼。普觀大會。人天之眾無量無數。告苾芻眾言。過去如來應正等覺。集會人天。而為說法。亦復如是。我於今日。普集人天。欲為說法。汝等受持。若人勇猛。決定無畏。猶如師子。深信堅固而無所著。大地山間乃至梵世。皆得涅槃。說是法時。復有一千七百有學天人及無數諸天。光明照耀。來詣佛所。佛告苾芻。汝等諦聽。我觀彼等諸來天眾。應以聲聞所樂之法。而可度之。

爾時復有七千大藥叉。具大神通威德。光明照耀。與諸眷屬。恭敬圍繞。來迦毗羅林。

復有六千大藥叉。住金山上。具大神通威德。光明照耀。與諸眷屬。恭敬圍繞。來迦毘羅林。

復有三千大藥叉。住娑多山。具大神通威德。光明照耀。與諸眷屬。恭敬圍繞。來迦毘羅林。

復有供毘羅等百千藥叉。住王舍城尾布羅山。具大神通威德。光明照耀。與諸眷屬。恭敬圍繞。來迦毘羅林。

復有濕嚩彌怛囉。半左始。尾濕嚩彌嚩等藥叉大將。具大神通威德。光明照耀。與諸眷屬。來迦毘羅林。

復有東方護世天王乾闥婆主。名地里多囉瑟姤囉。具大神通無量威德。身色妙好。光明熾盛。與其眷屬。恭敬圍繞。來迦毘羅林。集會聽法。南方護世天王。鳩槃荼主。名尾嚩茶迦。具大神通無量威德。身色妙好。光明熾盛。與其眷屬。恭敬圍繞。來迦毘羅林。集會聽法。西方護世天王。是大龍主。名尾嚩博叉。具大神通無量威德。身色妙好。光明熾盛。與其眷屬。恭敬圍繞。來迦毘羅林。集會聽法。北方護世天王。大藥叉主。名俱吠囉。具大神通無量威德。身色妙好。光明熾盛。與其眷屬。恭敬圍繞。來迦毘羅林。集會聽法。復有四大天王。侍從鬼神。所謂摩野。迦致。尾枳致。跋里虞。跋里俱致等。皆有神通勢力。我慢無明。形貌麤惡。種種變化。與其眷屬。恭敬圍繞。來迦毘羅林。集會聽法。

復有藥叉神將。所謂印捺囉。謨嚩嚩拏。鉢囉惹鉢帝。婆囉捺嚩惹。伊舍曩。贊難曩。迦麼。悉里瑟吒。俱儂建吒。儂建吒。滿尼摩尼摩尼左囉。鉢囉拏那。烏波半左迦。娑多儂里。海摩嚩多布囉拏佉囉俱尾吒虞波羅藥叉。阿吒嚩俱曩囉惹[口*爾]。曩里沙婆啣怛囉細曩。嚩馱里嚩。嚩里伽設帝摩多隸。半左囉嚩拏穌謨摩曩彌里具。并其眷屬。怛里頗梨。怛里建吒計。乃至世間行者。俱有神通威德。光明照耀。恭敬圍繞。來迦毘羅林。集會聽法。復有諸大毒龍。所謂怛叉迦。劍末羅濕嚩多嚩。鉢囉鉢多。鉢囉惹虞。莎虞曩娑賀掃那娑俱。地里多囉瑟吒囉。俱祖囉。愛囉嚩尼龍等。瞋恚暴惡。有大神通威德。光明熾盛。與諸眷屬。恭敬圍繞。來迦毘羅林。集會聽法。

復有金翅鳥。名曰無畏。與其飛禽清淨眼等并諸眷屬。亦具神通威德。光明照耀。恭敬圍繞。來迦毘羅林。集會聽法。

復有無能勝金剛手。海內住者。一切怖畏藥叉。并其眷屬。皆具神通威德。光明照耀。恭敬圍繞。來迦毘羅林。集會聽法。

復有阿修羅眾。所謂尾麼啣怛囉。穌啣怛囉。鉢囉賀。那母啣隸。及一百末隸阿修羅子。并諸眷屬。具大神通無量威德。光明照耀。恭敬圍繞。來迦毘羅林。集會聽法。

復有四大王天。忉利天。夜摩天。兜率陀天。化樂天。他化自在天。及諸天眾。皆具神通威德。光明照耀。恭敬圍繞。來迦毘羅林。集會聽法。

復有名天。所謂嚩嚩拏天。嚩嚩尼天。穌摩天。畢里瑟吒天。阿誡摩天。蜜怛囉嚩嚩尼天。地天。水天。火天。風天。如是十天。具大威德。神通變現。并其眷屬。光明照耀。恭敬圍繞。來迦毘羅林。集會聽法。

復有那羅延天。娑賀梨左天。日天。月天。星宿天。帝釋天。莫伽天。一切最尊賢聖天。并二眷屬天等。如是十天。具大神通無量威德。光明照耀。恭敬圍繞。來迦毘羅林。集會聽法。

復有諸天女等。所謂娑呬迦天女。如火焰天女。阿里瑟吒天女。穌摩天女。烏多摩天女。補瑟波嚩悉儻天女。左囉迦天女。穌跋捺囉天女。羯叉阿左喻多天女。鉢囉捺喻麼曩天女。莎儻迦等。無數天女。并諸眷屬。具大神通無量威德。身相端嚴。光明照耀。恭敬圍繞。來迦毘羅林。集會聽法。

復有大藥叉女。所謂舍摩藥叉女。摩賀舍摩藥叉女。摩耨沙藥叉女。摩耨數怛摩藥叉女。訖里拏藥叉女。鉢囉謨沙藥叉女。摩曩鉢囉努沙迦藥叉女。末囉賀藥叉女。摩賀末囉藥叉女。苾芻牟尼迦藥叉女。如是十大藥叉女。亦具神通威德。光明照耀。與諸眷屬。恭敬圍繞。來迦毘羅林。集會聽法。

復有十大藥叉女。所謂輸訖羅藥叉女。羯拏末羅藥叉女。迦嚕拏藥叉女。儻羅迦嚩悉儻藥叉女。阿嚩那多計舍藥叉女。鉢囉目契閉多迦嚩悉泥藥叉女。娑那摩多藥叉女。賀里帝藥叉女。嚕啣迦藥叉女。如是藥叉女等。亦具神通威德。光明照耀。與諸眷屬。恭敬圍繞。來迦毘羅林。集會聽法。

復有賀里帝及童男童女眷屬。亦具威德神通。光明照耀。與諸眷屬。恭敬圍繞。來迦毘羅林。集會聽法。

如是十方梵王帝釋天人八部。諸大苾芻。無量無數。皆來集會。

爾時會中。有大黑神。名祖蹲那。具大神通。勇猛暴惡。惱害人天。障修善事。以手拍地。發大惡聲。於虛空中。化大風雲電雹雷閃種種惡相。眾皆驚怖。佛即觀察。說聲聞法。魔既聞已。歸依息惡。與諸苾芻。同住聲聞乘。是時眾會。見佛降魔。踊躍歡喜。信受奉行。

佛說大三摩惹經